

CAPUT X.

RÁMÆ DESCENSUS.

1. ILLI, INDRAE instar splendenti, magna prosperitate prædito, terram moderanti, decem millia fere annorum præteribant.
2. Nec potitus est lumine illo, filio appellato, a debito erga majores liberante, atque illico mœroris tenebras dispellente.
3. Progenie ejus caussam aliquam exspectante, rex diu manebat velut oceanus, antequam agitaretur, gemmarum procreatione nondum manifestata.
4. RISHYASRINGAS alique sacerdotes pii, sensuum domitores, progeniem illius exoptantes, instituebant sacrificium pro filio obtinendo.
5. Eodem tempore dei, vexati a RÁVANA, adibant VISHNUEM, sicut viatores, æstu afflicti, arborem opacam.
6. Simulac illi ad oceanum pervenissent, expergefactus est deorum princeps: nam cunctationis absentia indicio est, negotium bene cessurum esse.
7. Cœlicolæ conspexerunt illum, recubantem in serpentis corpore, tanquam cubili, membris collustratis a gemmis, quæ in serpentis caput orbibus splendebant.
8. Deus pedes suos deposuerat in gremium LAKSHMIS, loto insidentis, quæ cingulum suum panno serico texerat, atque manus suas surculorum instar substraverat.
9. Ille, oculis apertæ loto similibus, veste recentis solis colore tincta indutus erat, diei autumnali similis, cujus initium gratum est adspectui.
10. Gestabat ille in lato pectore *Kaustubham* gemmam, aquarum medul-